



*Jumat, 30 September 2022*  
**Ogen: Jesaya 30:8-14**



**Ngelawan Dibata**



Sada cataten sejarah i bas kegeluhen bangsa ras negaranta si seh asa genduari iperingeti sebagai gerakan 30 September, i ja lit i je usaha ngelawan pemerintah Indonesia si sah. Terlepas kai si erbahansa maka bage, si jelas paksa e lit pitu kalak jendral si iculik ras ibunuh. Lit ka si jadi korban anggota keluarga pe. Enda jadi cataten sejarah berbangsa ras bernegaranta Indonesia si ngingetken kita gelah metenget nandangi erbage perukuren sekalak jelma si isekhenna ras mpengaruhi kelompok-kelompok tertentu si kedungenna banci ncedai bangsa enda.

Nai nari seh asa genduari, lit nge lalap kalak ntah bangsa si mekeng, lit nge si ngajuk-ngajuk ras singikutken sura-sura tertentu. Ate-atena saja ngenca ibahanna, deba kuga ka pe la kutera tapi lit ka nge seh mberontak. Enda me si ituriken rikutken kegeluhen bangsa Dibata. Bagi si ituriken Jesaya kerna cataten sejarah kegeluh bangsa Dibata, bangsa si ngelawan Dibata, jahat, la nggit megiken pengajaran Dibata, kai si benar. Nabi-nabi isuruhna ngerana kerna kai-kai saja si ngena atena, labo si ngena ate Dibata. Erkiteken si e isekhenna Dibata kataNa, erdosa bangsa e, ialokenna ukumen desken kudin taneh si perper, pecah-pecahna pe la erguna.

Dibata labo ngena atena kalak si la patuh, kalak si ngelawan, kalak si ukurna atena ipejangjangna. Tentuna perukuren si bagenda melala kal bas geluhta. Banci saja dirinta pe lit ka nge turah perukuren si bagenda rupana. E maka arah renungenta paksa enda, marilah si peturah ras si asuhi pusuh ras ukur si nggit patuh. Si megiken ras ndalanken kai si ikataken Dibata amin megati agak meser ras mesera si akap ndalankenca tapi e guna kiniulinta si enggo irangsang Dibata.